

MOZIO ARRUNTA, ALTZAKO SANTA BARBARA AUZOAN DAGOEN AZPIESTAZIO ELEKTRIKOA DELA ETA

EH BILDU udal taldeko bozeramaile Reyes Carrere Zabalak, Udaltzaren Organo Araudiko 98. artikulua oinarri, honako MOZIO ARRUNT hau aurkezten du, Altzako Santa Barbara auzoan dagoen azpiestazio elektrikoa dela eta.

JUSTIFIKAZIOA

Altzako Santa Barbara auzoan argindar azpiestazio bat dago. Azpiegitura hori auzoaren eta zelaien arteko mugan dago, Felix Iranzo kaleko azken etxeen albo-alboan. Auzotarren betiko nahia izan da instalazio elektriko hori hortik kentzea, pertsonentzako arriskutsua dela uste baitute, eta eremu hori beste eginkizunetarako baliatu daitekeelako.

Goi tentsioko instalazio elektrikoetako baldintza teknikoei eta segurtasun bermeei buruzko 337/2014 Errege Dekretuak¹ ezartzen dituen instalazio baldintzek argi erakusten dute horrelako azpiegiturek eragiten dituzten arriskuak, bereziki bizileku inguruetan daudenean. Besteren artean shock elektrikoak eragiteko arriskua dago, baita uhin elektromagnetikoen eraginpean bizitzeko, zaratak jasateko eta suteak gertatzeko arriskua ere. Horregatik ere, goi tentsioko instalazioen inguruan gehieneko muga onargarriak gainditzen ez direla egiaztatzeko, administrazio publiko eskudunek instalazioaren titularrari eskatu diezaioke eremu magnetikoen neurriak hartzeko. Era berean, araudiak agintzen du instalazio horiei zaintza eta berriskupenak egitea, gutxienez hiru urtean behin, egoera egokiari eusten diotela bermatzeko.

Hain zuzen ere, Altza Osasuntsuagoaren Aldeko Plataformako kideek eta Harria Berriko (Arriaga Berri) auzotarrek eskatua zuten eremu horretan aparkaleku bat egitea, kiroldegi berriko lanekin aparkatzeko toki ugari desegin direlako. Iaz, Udal Gobernuak jakinarazi zuen aparkaleku berri bat eraikiko zuela Felix Iranzo eta Sasuategi kaleak batzen diren inguru horretan, eta horretarako, kendu egingo zituela aipatu azpiestazio horretatik abiatzen diren tentsio ertaineko bi argindar dorre, eta hariak lurperatu egingo zituela.

EH Bilduren ustez, aukera hori baliatu behar da Eusko Jaurlaritzaren Industria sailari eskatzeko memoria bat, aztertzeko azpiestazio elektriko horren inguru hurbilean dauden eremu magnetikoak eta, oro har, auzotarren osasunean eragin ditzakeen arrisku egoerak. Gogoan izan behar da, 1066/2001 Errege Dekretuaren² eraginez, Eusko Jaurlaritzak ebaluatu beharra dituela emisio erradioelektrikoekiko duten esposizioagatik herritarrek izan ditzaketen osasun arriskuak.

Gainera, beste txosten bat ere eskatu beharko litzaioke aztertzeko instalazioa egungo kokapenetik aldentzeko aukera.

1 <https://www.boe.es/boe/dias/2014/06/09/pdfs/BOE-A-2014-6084.pdf>

2 <https://www.boe.es/buscar/pdf/2001/BOE-A-2001-18256-consolidado.pdf>

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

Horiek horrela, EH BILDU udal taldeak honako mozio arrunt hau aurkezten du:

MOZIO ARRUNTA

1-Donostiako Udaltzarak hertsatuki eskatzen dio Eusko Jaurlaritzako Industria Sailari memoria txosten bat helaraz diezaiola, erakusten dituen Alzako Santa Barbara azpiestazio elektrikoaren inguru hurbilean egun dauden eremu magnetikoak eta, oro har, auzotarren osasunean eragin ditzakeen arrisku egoerak.

2- Donostiako Udaltzarak hertsatuki eskatzen dio Eusko Jaurlaritzako Industria Sailari helaraztea txosten bat instalazio elektrikoa egungo kokapenetik aldentzeko aukerak, eta horretarako behar diren urratsak eta baliabide ekonomikoak zehaztuta.

Donostian, 2021eko urtarrilaren 8an

Reyes Carrere Zabala
EH Bildu udal taldearen bozeramalea